

Munck Íslandi ehf.
Hlíðasmára 4
201 Kópavogur

Reykjavík, 6. desember 2019
UST201912-038/F.T.
08.08.02

Efni: Áform um áminningu og krafa um úrbætur

Umhverfisstofnun vísar í bréf dags. 12. nóvember 2019 þar sem stofnunin óskaði eftir tímasettri úrbótaáætlun vegna frávíka er fram komu í eftirliti þann 18. september 2019 og 10. október 2018. Frestur var veittur til 3. desember sl. til að skila inn áætluninni.

Frávikin frá eftirliti 2019 eru eftirfarandi:

1. Gr. 2.3 í starfsleyfi. Tryggja skal að starfsfólk fái kennslu og æfingu í að bregðast við mengunaróhöppum. Fram kom í eftirliti að engin námskeið væru haldin.
2. Gr. 2.3 í starfsleyfi. Umgengni skal vera snyrtileg á rekstrarsvæði. Skipulag og umgengni um rekstrarsvæðið eru ekki í samræmi við kröfur í starfsleyfi, svæðið er illa skipulagt og umgengni slæm.
3. Gr. 2.5 í starfsleyfi. Rekstraraðili skal vera með viðbragðsáætlun sem unnin er á grundvelli áhættumats þar sem taka skal á hugsanlegri hættu á bráðamengun og hvenær tilkynna skuli um mengunaróhöpp til Umhverfisstofnunar. Viðbragðsáætlun var ekki tiltæk við eftirlit.
4. Gr. 4.1 í starfsleyfi. Rekstraraðili skal hafa eftirlit með rekstrarþáttum sem geta haft í för með sér mengun eða losun efna út í umhverfið. Skrá skal reglulega upplýsingar, t.d. í rekstrarhandbók og skulu skráningar vera aðgengilegar eftirlitsaðila. Engar skráningar eru gerðar hjá rekstraraðila.
5. Gr. 4.2 í starfsleyfi. Mælingar skal gera einu sinni á ári vegna losunarmarka í gr. 3.6 og 3.7. Mælingar hafa ekki farið fram.
6. Gr. 4.8 í starfsleyfi. Rekstraraðili skal færa grænt bókhald í samræmi við reglugerð nr. 851/2002 um grænt bókhald. Niðurstöðum skal skila árlega. Grænu bókhaldi hefur ekki verið skilað.

Frávikin frá eftirliti 2018 eru eftirfarandi:

1. Gr. 2.3 í starfsleyfi. Samkvæmt gr. 2.3 á aðgangur óviðkomandi á svæðinu að vera bannaður. Við lóð malbikunarstöðvarinnar var skilti sem á stóð að aðgangur óviðkomandi væri óheimill en engin girðing er um lóðina og telst skiltið eitt og sér ekki fullnægjandi til að tryggja að óviðkomandi komi ekki inn á svæðið.
2. Gr. 2.3 í starfsleyfi. Samkvæmt gr. 2.3 eiga akstursleiðir á svæðinu að vera malbikaðar en svo er ekki.
3. Gr. 3.2 í starfsleyfi. Í gr. 3.2. í starfsleyfi segir að rykmengun skuli haldið í lágmarki með því t.d. að reisa skjólveggi eða nota vökvunarbúnað sem þolir frost

og íslenskar veðuraðstæður. Á staðnum voru nokkrar slöngur sem starfsmenn höfðu notað til að vökva hráefnahauga en það er ekki fullnægjandi.

4. Gr. 3.7 í starfsleyfi. Í gr. 3.7 segir að úðun vörubílsþalla skuli fara fram á olíuheldu áfyllingarplani með niðurfalli tengdu við olíuskilju. Ekki er til staðar neitt plan fyrir úðun vörubílsþalla heldur fer það fram á mól.
5. Gr. 3.8 í starfsleyfi. Samkvæmt gr. 3.8 á frágangur á geymum og lögnum fyrir eldfima vökva að vera í samræmi við reglugerð nr. 884/2017. Í gr. 43 í reglugerðinni er varðar kröfur til lausageyma segir að öruggar mengunar-, árekstrar-, eld- og slysavarnir skuli tryggðar við rekstur lausageyma. Við malbikunarstöðina voru tveir lausageymar sá malarplani án nokkurra árekstrar eða lekavarna.
6. Gr. 4.2 í starfsleyfi. Samkvæmt gr. 4.2 á að vera til staðar verklag eða tæknilegar lausnir til að fylgjast með virkni reykhreinsivirkis. Ekki er neinn slíkur búnaður eða verklag til staðar hjá rekstraraðila.
7. Gr. 4.3 í starfsleyfi. Í gr. 4.3 í starfsleyfi segir að setja skuli upp myndavélaeftirlit til að fylgjast með rykmyndun á svæðinu. Þetta myndavélakerfi er ekki til staðar.

Umhverfisstofnun veitti frest til að senda inn tímasetta áætlun um úrbætur vegna framangreindra frávika til 3. desember sl. Umhverfisstofnun hefur enn ekki borist tímasett áætlun um úrbætur. Stofnunin áformar því að áminna rekstraraðila, sbr. 2. tl. 1. mgr. 60. gr. laga nr. 7/1998, um hollustuhætti og mengunarvarnir. Jafnframt er gerð krafa um úrbætur. Umhverfisstofnun veitir rekstraraðila frest til 20. desember nk. til þess að skila inn tímasettri áætlun um úrbætur eða koma sjónarmiðum sínum á framfæri, sbr. 13. gr. stjórnslulaga nr. 37/1993.


Vakin er athygli rekstraraðila á því að Umhverfisstofnun hefur heimildir samkvæmt XVII. kafla laga nr. 7/1998, um hollustuhætti og mengunarvarnir, til þess að knýja á um framkvæmd ráðstöfunar samkvæmt kröfum stofnunarinnar. Stofnunin getur m.a. lagt á dagsektir og stöðvað starfsemi.

Áminning mun verða birt á vefsíðu Umhverfisstofnunar komi til slíkrar ákvörðunar. Jafnframt mun stofnunin birta á vefsíðu sinni sjónarmið fyrirtækisins.

Gjald fyrir vinnu sérfræðings við eftirfylgni vegna frávika frá ákvæðum starfsleyfis verður innheimt samkvæmt gjaldskrá Umhverfisstofnunar nr. 535/2015, með síðari breytingum.

Óski rekstraraðili eftir frekari upplýsingum má hafa sambandi við Frigg Thorlacius í síma 591-2000 eða með tölvupósti á frigg.thorlacius@ust.is. Gögnum skal skila í pósti til Umhverfisstofnunar eða á netfangið ust@ust.is.

Virðingarfyllt



Skúli Þórðarson
sviðsstjóri

Frigg Thorlacius
Frigg Thorlacius
lögfræðingur

Afrit: Heilbrigðisnefnd Hafnarfjarðar- og Kópavogssvæðis